

wyšši farań, kiž serbski rozumi, k. lic. theol. Sauer, hač pak tež serbski přěduje, njewěmy.

Wjesne šule maš w Bobolicach, na Lědach a na Lipjem; serbski drje so we nich ženje wučilo njeje, znajmjeńša tam nihtó ničo wo tym njewědzeše. A tola ma, kaž mi to Lubnjowski cyrkwjenc, stary nazhonjeny Němc, powědaše, hišće džensniši dzeń Boboličanski wučer z někotrymi džěćimi nuzu, zo jim serbsku rěč wotwuči a něšto němski nawučí, z krutym zakazowanjom serbski rěčeć. — Tute tři wsy su pak hišće džensa zwjetša serbske, a było by po tajkim nuzno, jim tež zaso Bože słowo w maćernej rěči podawać.

Bobolice, wulka a z džěla bohata wjes bjez ryćeřkubła, maju 89 hospodařstwow. Potym, štož tam widžach a wot spomnjeneho Lubnjowskeho cyrkwjenca a jeneje stareje Boboličanki slyšach, rozumja tam a powědaju starši ludžo hišće wšitcy serbski, tež dorosćena młodžina wuměje serbski a mjez tym zo žowča tež zwjetša serbsku rěč wužiwaju, „so gólcy jeje sromaju“. Wot šulskich džěćí jeno počojca serbski rozumi a domach z džěla powěda, zwonka pak nic dla hańbićiwosće. Na wsy slyšachmoj dweju hospodarjow so serbski mjez sobu rozmołwjeć, a jedyn z njeju namaj wobswědći, zo wšitcy wobydlerjo wot młodych, kiž su ze šule, serbski rozumja, přistajicy: „wot młodšych pak jo wjele bawarskich“ t. j. němskich abo tajkich, kotřiž radšo němcuja.

Na Lědach (z ca. 350 wobydł.) je runje tak kaž w Bobolicach ze Serbowstwom, po jenej powěsći tam hišće mjeńši džěl šulskich džěćí serbski rozumi a powěda.

Lipje je hišće najbóle serbska wjes Lubnjowskeje wosady, ale po mojim zdaću tež najbóle wot Barlinskeje kultury wobližana a na wašnja wulkeho města zwukła. Jako starši ludžo do šule khodžachu, je so hišće serbski spěwało (najskeřšo póstne a jutrowne kěrluše dla potřebnosće); nětko pak šula tež tu na přeněmćenju džěla, runjež je wučer Serb a serbskeje rěče mócný. Nimo wšeho toho rěča nimale wšě džěćí domach ze staršimi a na wsy při hrajkanju tež džensa hišće serbski, hač runje tomu přeciwo stoji druhe, ale mjenje wěrohodne swědćenje, zo je na Lipjem jenož hišće mjeńša počojca džěćí serbska. Ja tam w l.